



18. januar 2023

UPA 2023/160

Inatsisartut Suleriaasianni § 36 naapertorlugu apeqquteqaat aallaavigalugu siunnersuut imaattoq matumuuna saqqummiuppara:

**Qanoq iliornikkut puiserpassuit pisarineqartartut amiiginnariarlugit ilivitsuutillugit imaanut eqqaannarneqartartut pinaveersaartissinnaaneri pillugu apeqquteqaat aallaavigalugu oqallisissiasatut siunnersuut.**

(Inatsisartunut ilaasortaq Siverth K. Heilmann, Atassut)

Qulaani oqallisissiap ersersereepaa, Nunatsinni puisit pisarineqartartut kalaalimineerniarfinni tunisassiassaaleqinnginnerup nalaani amiiginnariarlugit kingumut imaanut kivisussanngorlugit eqqaannarneqarneri. Suna tamarmi nioqqutissat atortussallu akitsoriartorfiini, piniartup pisariaqartilluinnarpaa tulaassami aningaasatigut isertitsissutiginnissaa aammalu Nunatta ilaani pingaartumik qimuttoqarfanni nerukkaatissatut atorineqarsinnaanerata periarfissarsiuuteqqinnissaanut paaseqatigiinnisarput.

Ukiorpaaluimmi matuma siornagut Maniitsumi ammerivimmik pilersitsinitta saniatigut puisip neqaata orsuatalu tunisassiarinnissaanut aqutissiuussisimavugut. Taamatut tamaviaaruteqarneq Maniitsumiinnaq ukiumut puisit 10 tusindit angullugit pisarineqartaleralluallarmata eqqaanerujussuarpullu ima annertutigilermat, frysecontainerit immeriarlugit qimuttoqarfiit pissarserusuttut pilersorneqarsinnaaneri aqutissiuukkaluarnikuuvakka. Inuussutissalerinermili inatsisaasoq malillugu, qimmit qimuttut inunnik ajornerusumik nerukkaasersorneqassanngitsumik tungavilersortoqarluni aammaasit suliniut unitsiinnarallarsimavara.

Nunatta ammerivianiit puisit amiisa ikilerialaarsimanerigalui nioqqutissiarineqarnerilu pillugit qisuariarnerat kisiat tuppallersaatigissanngilarput, inuilli qinigaattut aqutissiuussisussaavugut Atassummiit oqartarnittuut sunaluunniit imaaniit qaqitaq aalisartuniit piniartuniillu aningaasarsiuutigineqarluni tunisassiarineqarnissaanut aqutissiuussinitsinnut oqaluinnarata pikkorinnerujussuusariaqarpugut.

Taamaattumik Inuussutissalerinermut inatsisaasup Qallunaat Nunaanniit Nunatsinnut akisussaaffiup tiginissaanut piaartumik naammassineqarnissaa pisariaqarlunnarsoralugu eqqaasinnaavarput, siusinnerusukkummi inatsisartuni pineqartup angerlaannissaanut tamakkiisumik tapersersuinerput oqariartuutigisareerparput.

Taamatut oqallisissiasamik saqqumiilluta isummasi tusarusuppagut, kingornalu aaqqiissutaasinnaasumik isumaqatigiikkutta alloriaqqinnissamut qilanaalereerparput.